

► For di ayera den acto presidi dor di Minister Ramon Lee Museo di Antiguedad Aruba ta carga e nomber di su fundador sr. Juan Mario Odor



ORANJESTAD - Ayera merdia Minister di Cultura, Ramon Lee a devela un plakaat den Museo di Antiguedad Aruba p'asina rindi un tributo na su fundador, sr. Juan Mario Odor (q.e.p.d), kende a traha masha duro pa conserva cantidad di obhetonan cu a bira un testimonio di nos historia. Sr. Odor tabata fundador di Museo Numismatico y co-fundador

tambe di Museo Historico Arubano den Fort Zoutman. E acto aki a conta cu presencia di varios mandatario y Parlamentario di MEP, cu a celebra hunto cu famia Odor e acto oficial aki caminda Museo di Antiguedad lo carga el nomber di su fundador. Durante e diferente actividad cu a wordo organisa rond di nos isla pa celebra nos Dia Nacional di

Himno y Bandera, e museo di antiguedad situa na Timbalstraat 11 (Tarabana) a ricibi un cantidad di bishitantenan cu a keda masha impresiona pa e cantidad di articulo arqueologico y antiguo di Aruba cu ta wordo exhibi den e museo aki. Minister Ramon Lee a ofrece e casita historico (banda di parada di bus na Playa) pa bira eventualmente sede di e Museo Numismatico. Ainda e posibilidad aki no ta oficial aunke na nos humilde opinion e museo di antiguedad lo por resulta masha atractivo den e sector aki. Sinembargo mester yega na un acuerdo cu famia Odor mirando cu esaki ta un museo propiedad di e famia aki.

